



Cour  
Pénale  
Internationale

International  
Criminal  
Court

ICC-PIDS-FS-02-001/09\_Ach

# Bedo tye pa joo ma kitimo bal i kum-gi i Kot



Cal: Ron Haviv/VII

**M**alube ki tic pa Kot me Wilobo pi Bal, joo ma kitimo bal i kum-gi gitwero cwalo lok bot Procekyuta kun gilego en me cako kwedo lok. Tye bene jami aryo manyen ma piretek ma kwako joo ma kitimo bal i kum-gi. Pi tyen mukwongo i tekwaro pa ngol matir me wilobo i kum bal, joo ma kitimo bal i kum-gi gitye ki twero me bedo i winyo pido ki penyo pi cul. Man tyen lokke ni pe gimiyo lok macalo lucaden keken, ento bene giromo tito tam-gi ki gung cwiny-gi ikare weng ma pido.

Man gibimaro timo-ne kun gitiyo ki lucung pir-gi i lok kum cik. Joo ma kitimo bal i kum-gi ma gubedo macalo lucaden i nyim Kot givinongo kony dok kibigwoko-gi. Tic pa joo ma kitimo bal i kum-gi i kare me pido i nyim Kot me wilobo pi bal medo kero pa Kot me neno ni kiketo i ter cik dano ma bal maracu ma okelo lwo ro bot lwak me wilobo cung i wii-gi. Man ojenje i kum lok ni ngol matir twere ka kiwinyo dwon joo ma kitimo bal i kum-gi dok bene kicobbo can ma guneno.

Joo ma kitimo bal i kum-gi aye joo ma gunongo awanu macalo adwogi me bal ma poto i ter twero me tic pa Kot. Ka kibalo jami ma kiketo pi dini, pwonye, tic cing, diro tet, science onyo mic ma kimiyo nono, dul ma kibalo jami-ne bene kitwero tero calo joo ma kitimo bal i kum-gi. Lungolkop me Kot me Wilobo pi Bal bimoko kit awanu ma omyero Kot oti iye. Ento, kigeno ni i kin awanu magi bibedo; awano i kom dano, bale pa wic, manongo dano meno wiye obale pi gin ma kitimo i kome onyo ma en oneno; onyo bale pa jami ma nongo kibalo jami onyo jami orweny.

Me konyo joo ma kitimo bal i kum-gi, Kot oyabo cekcon ma neno bedo i Kot ki culo joo ma kitimo bal i kum-gi (VPRS) ki unit ma tiyo pi lucaden ki joo ma kitimo bal i kum-gi (VWU); gin weng nonge i Regictri. VPRS konyo

joo ma kitimo bal i kum-gi i lok ma dok i kum kwac me bedo tye i Kot onyo me cul, onyo gin aryo weng. Dul man bene konyo joo ma kitimo bal i kum-gi me nongo tam i lok kum cik ki me yubo kit me nongo lacung pir-gi i lok kum cik. Me nongo dok oo bot joo ma kitimo bal i kum-gi, VPRS tye ka ye le me kubo wat ki dul pa joo ma kitimo bal i kum-gi, dul ma pe jenge i kum gamente ki dul mukene me lobo meno ki me wilobo, tutwale i lobo ma Kot tye ka tic iye.

VWU gwoko ki konyo kweyo cwiny lucaden, joo ma kitimo bal i kum-gi ma gibino i Kot ki dano mukene ma gitye ki lwo ro pi lok ma gutito. VWU miyo tam, pwonye ki kony bot dul mukene me Kot malube ki kit me gwoko ber bedo ki kwoo pa joo ma kitimo bal i kum-gi ki lucaden. Kigwoko tutwale miti pa lutino, dano mutegi, lungolo ki joo ma kitimo bal me gero me butu i kum-gi onyo bal mukene ma kwako mon ki coo. Unit man bene yubo porogram me gwoko lucaden.

## Bedo tye i Kot

Joo ma kitimo bal i kum-gi giromo timo gin man:

- Cwalo lok bot Procekyuta madok i kom bal ma gitamo ni otime;
- Tito lok i nyim Kot ka kilwongo gi calo lucaden;
- Ka gin mo tye ma kwako miti pa joo ma kitimo bal i kum-gi ci giromo miyo tam gi ki gung ic gi i nyim Kot i kare ducu me pido, i yoo ma pe turu twero onyo ma lube ki twero pa dano ma tye ka pyem adot dok ki pido i yoo matir labongo apokapoka. Joo ma kitimo bal i kum-gi giromo timo man i acaki me pido (me labole i kare me winyo lok kama Procekyuta penyo twero ki bot lungolkop me cako kwedo lok, onyo i kare ma Procekyuta penyo Kot me moko adot ma kikelo i kum dano ma kidoto) wa i kare me pido ki koko apil;
- Penyo pi cul.

Joo ma kitimo bal i kum-gi gitwero kwayo me bedo tye i pido i kare mo keken inge pongo fom ma kiyubo ma kwayo Kot wek en obed tye i pido. Lungolkop i Jang Kot ma rwatte winyo kwac magi weng. Lungolkop moko ka dano man onongo awanu macalo adwogi me bal ma kitimo ma poto i ter twero me tic pa Kot. Lungolkop bene moko kare ma joo ma kitimo bal i kum-gi giromo kelo kwede tam-gi ki gung cwiny-gi dok yoo ma gikelo kwede lok gi.

### Lacung i lok kum Cik

Bedo tye i pido pa joo ma kitimo bal i kum-gi bitime pol kare kun nongo gitiyo ki lacungu pir-gi i lok kum cik. Pol kare, joo ma kitimo bal i kum-gi pe omyero ocit i nyim Kot ka pe gimito. Lucung pir-gi i lok kom cik aye bitito tam-gi ki gung cwiny-gi bot Kot. Joo ma kitimo bal i kum-gi gitye agonya me yero lacung pir-gi i lok kum cik, ma myero obed dano ma tye ki ngec matut i tic cik calo lapilida i lok kum bal, langolkop onyo Procekyuta, dok myero ongee dok olok maber leb acel ma Kot tiyo kede (leb Munu onyo Frenc).

ICC bikonyo joo ma kitimo bal i kum-gi me nongo lacung pir-gi i lok kum cik manongo gimio nying lupilida ma kiyee ni gutii i Kot. Kadi bed ni lim pa Kot pi kony me cik nok, Kot twero miyo kony mo me lim. Med i kum meno, Opici pa Lupilida pa Lwak pi joo ma kitimo bal i kum-gi bibedo tye me miyo kony me cik bot joo ma kitimo bal i kum-gi labongo cul.

Ka joo ma kitimo bal i kum-gi pol, lungolkop twero penyo joo ma kitimo bal i kum-gi me yero lacung pir-gi i lok kum cik acel macung pi gin ducu onyo dul pa lucungu pir-gi i lok kom cik, wek pido owot maber. Ka pi tyen lok mo joo ma kitimo bal i kum-gi pe gitwero yero lacung pir-gi i lok kum cik acel wek ocung pi gin ducu, ci lungolkop twero lego Regictra me Kot me timo man. Ka joo ma kitimo bal i kum-gi i-gi pe yom ki yer pa Regictra me Kot, gin twero penyo lungolkop me neno ne odoco.

### Miyo ngec

Ka Jang Kot omoko lok i kum kwac pa dano ma kitimo bal i kume dok oneno kit ma dano man bibedo kwede i pido tutwale i lok ma kikelo i nyim Kot onyo i adot moni, dano meno ki bimine ngec i kum jami ma tye katime i kare weng me pido, ma ikine tye iye nino dwe me winyo lok, lok ma Kot omoko ki apil mo keken.

### Cul

Joo ma kitimo bal i kum-gi giromo penyo pi cul malube ki awano ma gunongo inge bal ma kitimo i kum-gi ma poto i ter twero me tic pa Kot. Kot romo tic ki twero ne me moko cul pi joo ma kitimo bal i kum-gi kadi bed joo meno pe gukwayo. Joo ma kitimo bal i kum-gi giromo cwalo kwac gi dok Kot bimoko ka omyero kimini-gi cul ki kit acul ango ma omyero kimi. Kot twero golo oda me cul mapatpat, ma ikine tye iye magi:

- **Cul**, man pole obedo cente ma kiculu pi bal ma kitimo ma kwako kit dano, i kum jami, ki awano i kum dano. I kin man romo bedo cul pi awanu me kum ki me wic, rweny pa jami ma kelo lim, arem, can ma gulimo ki cwer cwiny ma balo wic ki bale pa gum pa ngat moni.

- **Dwoko jami**, manongo kimito ni kidwok, kit ma twere kede, kwoo pa joo ma kitimo bal i kum-gi kit ma onongo gitye kwede ma onongo pwod pe ya gunongo awanu. Ikin man romo bedo dwoko jami.

- **Roco kwoo pa dano**, ma tye pi neno ni joo ma kitimo bal i kum-gi gumede ki kwoo kit me nino ducu kit ma twere kede. Roco kwoo pa dano romo bedo i kine cul pi ot yat, kweyo cwiny onyo cango two wic, medo ki kony ma kinongo pi yubo kwoo pa dano i kin gang, lok kum cik ki kony mukene ma mite pi roco kwoo pa joo ma kitimo bal i kum-gi ki dwoko rwom me kwoo-gi kit ma mite.

I agiki me pido, Jang Kot me Pido twero golo oda ki ngat ma Kot ongolo bal i wiye ni ocul onyo odwok jami pa joo ma kitimo bal i kum-gi malube ki bal ma en otimo. Kot twero miyo cul pi dano acel-acel onyo bot joo kitimo bal i kum-gi weng kacel; man kitimo i yoo mo keken ma rwatte bot joo ma kitimo bal i kum-gi pi adot moni. Culo dano weng kacel ber pien konyo i kweyo cwiny lwak ducu ki keto dano i yoo ma weko gicako yubu kwoo-gi. Macalo lapore, giromo gero kabedo ma miyo kony bot joo ma kitimo bal i kum-gi, me bedo macalo lanyut pi yoo me tic ma kikwanyo. Medo i kum meno, Lobo ma Lumemba me ICC ocalo keto lim pi joo ma kitimo bal i kum-gi malube ki bal ma tye i ter twero me tic pa Kot pi culo joo magi ki lugang-gi kadi bed ni dano ma kingolo bal i wiye pe tye ki jami ma romo culo pi bal man.

### Gwok ki kony

ICC omyero onen ni joo ma kitimo bal i kum-gi ki lucaden kimiyo ki gin gwok me kom ki me cwiny, woro dok kigwoko mung-gi. Ka joo ma kitimo bal i kum-gi otito lok i nyim Kot calo lucaden, unit pa lucaden ki joo ma kitimo bal i kum-gi (VWU) miyo kony ma mitte wek gubin i nyim Kot, dok tiyo me neno ni kigwoko rwom me woro ma mitte pi lucaden ki bene me neno ni tito lok meno pe binyayo peko, awanu onyo arem me wic ikom joo meno. Kimiyo kony me kweyo cwiny ki kony mukene ma mitte bot dano ma owoto ki lucaden.

### Miyo ngec

Kot bigwoko kit me rwatte ki joo ma kitimo bal i kum-gi ma tye i pido onyo ma tye ka penyo pi cul i yo ma pe kelo peko mo i kum joo ma kitimo bal i kum-gi onyo i kum dano mukene, dok bigwoko lok ma joo ma kitimo bal i kum-gi omio i mung.

Malube ki kit me tic pa Kot, waraga me kwayo pi bedo tye i Kot onyo pi cul omyero kinyut bot Procekyuta ki lupilida. Kadi bed kumeno, dano ma ocwalo kwac bot Kot twero kwayo Kot ni lok ma en omio myero pe kinyut bot lwak, ka gitye ki lworo pi kwoo-gi onyo kwoo pa dano mukene. Gin bene romo kwayo Kot wek lok man pe okatti i rekod pa lwak ikare me pido. Lungolkop bimoko yo ango ma omyero kikwany ki twero golo oda ma rwatte ki kit me neno ni kigwoko lok ma dano ma kitimo bal i kume onyo lacung pire i lok kum cik omio i nyim Kot.